

MANIITSUP KOMMUNEANI ERNGUP NUKINGANIK NUKISSIORFIK

1 PINEQARTUT

Allakkiami pineqarput nukissiorfiliorfiusinnaasut eqqaanni pinngortitamut, sanaar-tukkanut avatangiisinullu tunngasutigut iluaqutaasinnaasut ajoqutaasinnaasullu. Tamakku innuttaasut isaannit aammalu piniartutut atuinerup tunngaanniit naliler-sorneqarput.

2 SUNNIUTAASUSSAT

Nukissiorfik nammineq immaqa avatangiisinut sunniivallaarnaviangilaq, taassuma qaqqap iluaniinnissaa ilimanarmat. Kisiannili nukissiorfiup sananeranut tunngatil-lugu avatangiisinut pinngitsoorani attuisussarujussuussaaq. Tassa sulluliarsuaq 25 km-nik takitigisoq 6 m-nillu silitsigisoq qaartitseraanni ujaqqat qaartitsikkat 1 mill. M3-utut annertutigissapput. Sapusianik sanasoqassaaq, nuna qarsutsiffiussaaq, kuuillu kuunneri allanngussap-put.

Aqqutissiorfissatut toqqakkat (aqquuserngit umiarsualiviillu) avatangiisitigut pissutsi-nut pingaaruteqartussaapput, aammalu piffiit piniarfittut naleqassusaannut sunni-iussaaallutik, taamaattumik ilanngussani erngup nukinga atorlugu nukissiorfiliorfiu-sinnaasut tunngannut aqqutiliorfiusinnaasut sukumiinerusumik nassuiarneqarput.

Tamanut aallarniutitut aqqutissat assartuiffissallu kangerlummiit aallaavilerneqas-sapput, kangerlummilu umiarsualiviliorortoqassalluni.

Aappaatut aqqusinniassaq piffinni annertunerusumik annikinnerusumilluunniit aqqulluttukkut sananeqartussaavoq.

Sanaartorfiusumi aqqusinniortoqartussaavoq, tamaani naasunik qajannartunik aseruisussaasunik.

Sanaartornerup nalaani upalungaarsimanissaq pillugu nukissiorfiup eqqaani piniarneq inerteqqutaassaaq.

3 SOOQ PINGAARNERSIUIISOQARPA

Pinngitsoorani pinngortitamut, avatangiisinut piniarnermullu pissutsinut sunniute-qarnerluttussaassaaq.

Tamaattumik Maniitsumi innuttaasunut pingaaruteqarpoq, nukissiorfinnik pilersi-tsisoqarnissaanik inissiiffissanillu toqqaasoqarpat salliutinneqartariaqartoq, pin-gortitamik avatangiisinillu ajoquusiinissaq sapinngisamik annikinnerpaaffianiitinnis-saa, aammalu nunap pisarneq malillugu atornerqarfiata annikinnerpaamik killilersu-iffigineqarnissaa.

4 TULLERIISSAARINEQ

Qulaani immikkoortitat malillugit nukissiorfiit tulleriiaarneqarput.

Taaneqartut siulliit akornutissanik annikinnerusunik nassataqartussaapput, kingullertullu taasat akornutissartaat annertungaarmata inassutigineqarsinnaanatik.

1. KANGERLUSSUATSIAQ/TASERSIAQ
2. MAJOQQAQ / SØNDRE ISORTUP ISUA
3. NUUP KANGERLUA / IMARSUUP ISUA
4. NIAQUNNGUNAQ / TASERSUUP ISUA
5. UMIIVIIT / TASERSUAQ
6. KANGERLUSSUAQ / SARFARTOQ / TASERSIAQ

4.1 KANGERLUSSUATSIAQ/TASERSIAQ

Nukissiorfik, umiarsualivik sanaartormilum aqqutit inissinneqarsinnaapput piniarfiuallaanngitsumi aalisarfiuallaanngitsumilu.

Pinngortitaq avatangiisillu annikitsuinnarmik attorneqartussaapput, Tasersiapaq eqqaani ukiukkut aqqutissiat sanaartormi aqqutit atorneqarnissaat naatsorsuutigissaanngikkaanni. Annertunerusumik marrartalimmik imermillu Kangerlusuatsiamut kuuttoqalissagaluarpoq, kisiannili qangali marraap akuinik imermillu kangerlummut annertuumik kuuttoqartareerpoq.

Kiisalu nukissiorfiup tunniussinnaasai annertungaarmata (3.832 GWh/a), aluminiumik aatsitsivimmik pilersitsisoqarnissaanut nukissiorfinnik allanik ilanissaat pisariaqarnavianngilaq, pisariaqalissagaluarpalli nukissiorfinnik allamik ataasiinnarmik sananissaq pisariaqassalluni.

Paasinarpoq maani nukissiorfiliortoqassappat tamanna avatangiisinut pinngortitamullu annikitsuaraannarmik ajoqusiisussaasoq, aammalu piffinni allani avatangiisinut pinngortitamullu ajoqusiinerit pinngitsoorneqassallutik, kiisalu tamaani allanilu piniarnermut aalisarnermullu soqutigisat pillugit aaqqiagiinngissutit pinngitsoorneqassallutik.

4.2 MAJOQQAQ /SØNDRE ISORTUP ISUA

Tamaani nukissiorfinnik inissiisoqassappat piniarnermut aalisarnermullu soqutigisat annikitsumik attorneqartussaapput.

Sanaartormerup nalaani piniarnermut tunngasunut akornusiisussaassaaq, kisiannili sanaartormerup kingorna sunniutai annikitsuaraannaassapput, ikittuinnaat Majoqqaq naallugu majortarmassuk.

Eqaluit ikilinissaat ilimanaateqarpoq, kisiannili eqaluit pisarineqartartut amerlassusaannut sunniuteqassagunaratik.

Ukiukkut aqqutissiat atorneqassagaluarpata, aammalu sanaartorfiusup tungaanut aqqusiniorani mittarfiliortoqassagaluarpat, tamanna avatangiisinut pinngortitamullu sunniinissaat annikitsuarsuussapput.

Ukiuunerani imermik aalaakkaasumik annertussulisimmik kuutsitsinerit sikusoqarneranik qarsutsinernillu kinguneqartassapput, kisiannili tamaani nunami kuuit kuuffii allangorartuaannarput, taamalu annikitsuinnarmik sunnerneqaatigisussaallugu.

Nukissiorfik nukinnik pissarsiffiusinnaavoq 1000 GWh/a, taamalu piniarfittut soqutiginaataanut aammalu avatangiisinut pinngortitamullu annikitsuinnarmik eqquisaanera ajoqutaanaviarani.

4.3 NUUP KANGERLUA / IMARSUUP ISUA

Nukissiorfiup inissinnera Maniitsup Kommuneaniinnaviangilaq, taamaattumik pinngortitamut avatangiisinullu aseruinnessamut nalilersuineq aammalu piniarnermut soqutiginaatai Nuup Kommuneani innuttaasuniit naliliiffigineqartariaqarlutik. Kisiannili uani tullerriiaarinerni ilaatinneqarpoq, nukissiorfimmiit aqutissiat/nassius-suinermi aqutit Maniitsup kommuneata iluaniinnissaat ilimanarmat, kiisalu nukissiorfiit sorliit Maniitsup kommuneaniitinneqarnissaanut apeqqutaatinneqartussaallutik, aammalu sutigut Maniitsup kommuneani pinngortitamut, avatangiisinut, piniarnermut aalisarnermullu sunniuteqassanersut.

Sanaartorfimmi tututtunniarneq eqalunniarnerlu ingerlanneqartarput.

Nunami tamaani illukoqarpoq.

Arlariinneq sulluliortoqassaaq, tatsit sapusiallu atanilerniarlugit, taamaattumik sanaartornermi aqutissiat pinngitsooratik pinngortitamut avatangiisinullu aseruinnessaat pinngitsoorneqarsinnaanani, kisianni ukiukkut aqutissiat atorineqassappata ajoqusiinerit annikinnerussapput.

Sanaartornerup nalaani soorunami tututtunniarneq kalluarneqartussaavoq, kisiannili sanareernerata kingorna, nukissiorfiup eqqannguani piniarnermik inerteqquteqarnissap saniatigut annikitsuinnarmik sunniuteqarfigissavaa.

Erngup marrarmik akullip kangerlummuk kuunna allannguuteqarujussuarnavianngilaq, ukiukkut imeq tarajuunngitsoq annertunerusoq kuuttassaaq, kisiannili aasakut annikinnerusumik, tamanna kangerluup sikusarnerunissaanik kingunerissavaa.

Nukissiorfik nukissamik 1480 GWh/a tunisisinnaassaaq, taamaattumik Majoqqarmiit piniarfittut soqutigineqarnerussagunaruortoq, tamaani nukissamik tunisisinnaanerata pinngortitamut avatangiisinut piniarnermullu annikitsuinnarmik ajoqusiinnaanerata nalimmassimatissavaa.

4.4 NIAQUNNGUNAQ / TASERSUUP ISUA

Tasersuaq tututtunniarnermut atatillugu atorineqangaatsiarpoq, aallaaniat arlaqartut tatsimi angallataateqarlutik.

Tassani inissiineq piniarnermut aalisarnermullu soqutigisanut attuissaaq, innuttaasut amerlasuut Niaqunngunamut sivikinnerusumik sivilunerusumilluunniit piniariartarmata. Niaqunngunaq aalisagaqarfissuuvoq, kangerlummilu pingaartumik Atammimiunit aalisariarfigineqarluartarluni.

Niaqunngunaq Kalaallit Nunaanni kangerluit anginerit ilagaat eqqiluilluinnartumik imeqartoq. Tamaani nukissiorfik inissinneqassappat, imeq marrarmit isortinneqassaaq, tamanna qularnanngitsumik aalisakkat amerlassusaannut sunniutipiloqartussaassaaq. Kisiannili ilimanangilaq pisarineqartartut amerlassusaannut sunniutaassasoq.

Aqutissiarineqartut pinngitsooratik avatangiisinut pinngortitamullu sunniisussaasapput, kisiannili ukiukkut aqutissiat atorineqassappata, sunniinera annikitsuinnaassaaq, aammalu periarfissaasup allap nukissiorfimmiit erngup Tasersuarmersup Nuup kangerluanut kuutsinnissaaniit sunniutaasussat annikinneerarsuutittussaallugit. Tassa tamaani nukissiorfiliortoqassappat tatsip eqqaani angisuunik

sapusiornissaq pisariqartinneqassaaq, aammalu erngup qummut killingata anner-tuumik qaffatsinneqarnissaa pisariaqassalluni.

Nukissiorfik nukissamik 500 GWh/a tunisisinnaassaaq, tunniussinnaasaatalu pinngortitamut, avatangiisinut piniarnermullu ajoquseerujussuarsinnaanera nukissiorfiit allanut inissinneqarsinnaaneri periarfissaatillugit imminut akilersinnaanngilaq.

4.5 UMIIVIIT / TASERSUAQ

Umiiviit aammalu Tasersuaq tutttunniarnermi umimmanniarnermilu atorneqarluarput. Ilaqutariit arlallit Tasersuarmi angallatinik uninngasuuteqarput, taserlu piniartillutik angallassinermut atortarlugu. Tasersuaq Tatsip Ataanut Angujaartorfimmullu attuumassuteqarpoq, tamaani ilaqutariit arlallit aasisarmata piniarlutik aalisarlutillu.

Nuna tamanna naggorissuuvoq, kisiannili nittaalaqarpiartannginnera sialoqarpiartannginneralu pissutigalugit mianernartuulluni.

Sanaartornermi aqutissat, sullorsuit sapusiallu pinngortitamut, avatangiisinut piniarnermullu ajoqusiinissaat taakkunannga sanaartukkanit allanit eqqaaneqareersunit annertunerussagunarpoq.

Nukissaq pissarsiarineqarsinnaasoq 900 GWh/a-ussaaq, kisianni taama anner-tutigisumik pissarsinaraanni pisariaqassaaq, erngup marrarmik akoqarluartup Torsut kuuaniit Tasersuarmut kuutsinneqarnissaa, taamaattoqassappat annilaa-nganaataassaaq Tasersuup arriitsuararsuarmik immertarnissaa. Torsut kuuannit imeq ingerlatinneqassappat pavanersuaq nunap ilorpasissuani annertoerujussuarmik sanaartornissaq pisariqartinneqassaaq, sanaartorneq avatangiisinut pinngortitamullu aseruinermik kinguneqartussaalluni.

Nukissiorfiit allanut inissinneqarsinnaatillugit nukissap pissarsiarineqarsinnaasup pinngortitamut, avatangiisinut piniarnermullu ajoqusisinnaaneriit annertuut nalim-massimatissinnaanngilaat.

4.6 KANGERLUSSUAQ / SARFARTOQ / TASERSIAQ

Nukissiorfik Sarfartumi nunami eqqissisimatitami, Kalaallit Nunaanni pinngortitat kusanarnerpaartaasa ilaanni inissinneqassaaq.

Nuna tamanna naggorissorsuuvoq, uumasorpassuarnillu umimmannik, tuttnik, ukallinik, kiisalu aqissinik amerlasuunik uumasuuffigineqarluni. Nittaalaqarpiannnginnera sialoqarpiannnginneralu pissutigalugit naasut mianernar-torujussuupput.

Nuna tutttunniarfiullunilu umimmanniarfiusarpoq, eqalunniarfigineqartarlunilu. Nunamut tamaanga takornarissat killeqartut tikittarput, kisianni siunissami amer-leriarujussuarnissaat ilimagineqarpoq.

Sanaartornermi aqutissiat sullorsualiallu pinngortitamut avatangiisinullu ajortumik sunnuteqartussaapput.

Ukiuunera tamaat imermik aalajangersimasumik kuutsitsinerup kingunerissavaa sikusarnerit qarsutsinerillu, qooqqullu sikusarnerunissaanik kinguneqassalluni. Naasoqassusaanut uumasooqassusaanullu ajortumik sunniuteqassaaq.

Nukissaaq pissarsiarineqarsinnaasoq 2500 GWh/a – 3170 GWh/a tungaanut annertutigissaaq, Kangerlussuatsiamiit/Tasersiamiit pissarsiarineqarsinnaasumit annikinnerussalluni.

Tasersiami pissarsiarineqarsinnaasoq Kangerlussuatsiaq aqutigalugu ajunnginnerusumik akikinnerusumillu pissarsiarineqarsinnaassaaq.

Taamaattumik Sarfartumi nukissiorfiliortoqassappat pinngortitamut avatangiisinut piniarnermullu ajoqusiinerit imminut nalimmassimatissinnaanngillat.